



# **IZMJENE I DOPUNE STATUTA UNIVERZITETA U SARAJEVU**

Sarajevo, juli 2024. godine



Na osnovu člana 61., a u vezi sa članom 56. Zakona o visokom obrazovanju („Službene novine Kantona Sarajevo“, broj: 36/22) i člana 59. Statuta Univerziteta u Sarajevu, oslonom na inicijativu Vijeća Univerziteta u Sarajevu - Stomatološkog fakulteta sa stomatološkim kliničkim centrom kojom se pokreće postupak izmjena i dopuna Statuta Univerziteta u Sarajevu broj: 01-14-35-1/23 od 26. 07. 2023. godine i donosi Odluka Vijeća Univerziteta u Sarajevu - Stomatološkog fakulteta sa stomatološkim kliničkim centrom, broj: 01-4-2-26-2/2024 od 30.04.2024. godine i Odluka Vijeća Univerziteta u Sarajevu - Stomatološkog fakulteta sa stomatološkim kliničkim centrom, broj: 01-4-2-27-2/2024 od 06.05.2024. godine, a u vezi sa Odlukom Senata Univerziteta u Sarajevu o statusnoj promjeni podjele članice Univerziteta u Sarajevu – Stomatološkog fakulteta sa stomatološkim kliničkim centrom na dvije punopravne članice Univerziteta u Sarajevu: Univerzitet u Sarajevu – Stomatološki fakultet i Univerzitet u Sarajevu – Stomatološki klinički centar, broj: 01-4-3/24 od 28. 02. 2024. godine i Odlukom Ministarstva za nauku, visoko obrazovanje i mlade Kantona Sarajevo o usvajanju Akcionog plana provođenja statusne promjene podjele u okviru Univerziteta u Sarajevu, broj: 27/03-04-8669-9/24 od 17. 04. 2024. godine, uz prethodno Mišljenje Odbora za normativna pitanja Univerziteta u Sarajevu, broj: 0105-5565-6/24 od 24. 05. 2024. godine i prethodno pribavljeno pozitivno Mišljenje Upravnog odbora Univerziteta u Sarajevu, na osnovu pozitivne ocjene Ministarstva za nauku, visoko obrazovanje i mlade Kantona Sarajevo o saglasnosti Statuta Univerziteta u Sarajevu sa Zakonom o visokom obrazovanju („Službene novine Kantona Sarajevo“, broj 36/22), broj: 27/03-02-34371-1/24 od 28. 06. 2024. godine, Senat Univerziteta u Sarajevu je na 71. redovnoj sjednici održanoj 17. 07. 2024. godine, donio *sljedeće*

## **IZMJENE I DOPUNE STATUTA UNIVERZITETA U SARAJEVU**

### **Član 1. (Izmjena i dopune člana 27.)**

U članu 27. Statuta Univerziteta u Sarajevu, broj: 01-14-35-1/23 od 26. 07. 2023. godine (dalje u tekstu: Statut), stav (2) mijenja se i sada glasi:

„(2) U sastavu Univerziteta kao članice djeluju: Rektorat, fakulteti, akademije, naučnoistraživački instituti i Stomatološki klinički centar.“

U stavu (2) tačka bb) Statuta mijenja se i sada glasi:

„bb) Stomatološki fakultet“

U stavu (2) nakon tačke bb) dodaje se nova tačka cc) koja glasi:

„cc) Stomatološki klinički centar“

U stavu (2) dosadašnje tačke cc), dd), ee), ff), gg), hh) i ii) postaju tačke dd), ee), ff), gg), hh), ii) i jj).

**Član 2.**  
*(Izmjena i dopune člana 108.)*

U članu 108. Statuta iza stava (1) dodaje se novi stav (2) koji glasi:

„(2) Stručno vijeće Stomatološkog kliničkog centra je najviše stručno tijelo Stomatološkog kliničkog centra iz oblasti stomatološke zdravstvene djelatnosti, a u vezi sa djelatnosti visokog obrazovanja.“

Dosadašnji stav (2) postaje stav (3).

Iza novog stava (3) dodaje se novi stav (4) koji glasi:

„(4) Od primjene stava (3) ovog člana izuzima se članstvo u Stručnom vijeću Stomatološkog kliničkog centra u kojem pravo na članstvo mogu ostvariti i članovi Vijeća Stomatološkog fakulteta.“

**Član 3.**  
*(Novi član 109a.)*

Iza člana 109. Statuta, dodaje se novi član 109a. koji glasi:

„Član 109a.  
(Sastav Stručnog vijeća Stomatološkog kliničkog centra)

Stručno vijeće Stomatološkog kliničkog centra čine:

- a) šefovi klinika i
- b) zdravstveno osoblje koje ima izbor u zvanje docenta, vanrednog i redovnog profesora na Univerzitetu u Sarajevu-Stomatološkom fakultetu.“

**Član 4.**  
*(Dopuna člana 111.)*

U članu 111. stav (1) Statuta iza tačke jj) dodaje se nova tačka kk) koja glasi:

„kk) U slučaju statusne promjene vijeće fakulteta/akademije koji/a je predmetom statusne promjene pokreće inicijativu za konstituisanje vijeća članice/a koja/e se osniva/ju.“

Dosadašnja tačka kk) postaje tačka ll).

**Član 5.**  
*(Novi član 113a.)*

Iza člana 113. Statuta dodaje se novi član 113a. koji glasi:

„Član 113a.  
(Nadležnosti Stručnog vijeća Stomatološkog kliničkog centra)

- (1) Stručno vijeće je stručno tijelo sa nadležnostima utvrđenim zakonom i Statutom.
- (2) Stručno vijeće nadležno je da:
  - a) donosi odluku o svim stručnim pitanjima u okviru svoje nadležnosti,
  - b) bira i razrješava direktora,
  - c) utvrđuje prijedlog pravilnika o unutrašnjoj organizaciji i sistematizaciji radnih mjesta članice,
  - d) donosi i druge opće akte članice u skladu sa zakonom i općim aktima Univerziteta,
  - e) utvrđuje poslovnik o radu Stručnog vijeća,
  - f) bira i razrješava šefove klinika i odgovorne ljekare/tehničare na prijedlog direktora,
  - g) razmatra zahtjeve i utvrđuje prijedloge za stručno usavršavanje radnika u zemlji i inostranstvu,
  - h) usvaja prijedlog za dodjelu zvanja primarijus u skladu sa zakonom,
  - i) usvaja plan i program rada klinika,
  - j) usvaja plan i programa specijalizacija,
  - k) usvaja prijedlog finansijskog plana/budžeta,
  - l) razmatra i usvaja izvještaj o radu sa finansijskim poslovanjem,
  - m) obavlja i druge poslove u skladu sa ovim statutom i drugim općim aktima.“

**Član 6.**  
**(Novi članovi 116a. i 116b.)**

Iza člana 116. Statuta dodaju se novi članovi 116a. i 116b. koji glase:

„Član 116a.  
(Nadležnost direktora Stomatološkog kliničkog centra)

- (1) Stomatološkim kliničkim centrom rukovodi direktor u skladu sa zakonom i ovim Statutom.
- (2) Direktor obavlja poslove utvrđene zakonom i ovim Statutom, a naročito:
  - a) rukovodi poslovanjem članice i potpisuje akte članice,
  - b) podnosi Stručnom vijeću prijedlog finansijskog plana/budžeta,
  - c) podnosi Stručnom vijeću izvještaj o radu sa
  - d) podnosi Stručnom vijeću izvještaj o finansijskom poslovanju,
  - e) predlaže poslovnu politiku i nalogodavac je za izvršenje budžeta/finansijskog plana na osnovu pisanog ovlaštenja rektora Univerziteta u skladu sa zakonom i ovim statutom,
  - f) zastupa članicu u pravnom prometu i ima prava i obaveze utvrđene zakonom i odredbama ovog Statuta,
  - g) raspoláže finansijskim sredstvima do 150.000,00 KM po pojedinačnom nalogu u okviru finansijskog plana,
  - h) predlaže opće akte Stomatološkog kliničkog centra,
  - i) saziva i predsjedava sjednicama Stručnog vijeća u skladu sa općim aktom,
  - j) pokreće disciplinski postupak i donosi odluku o izricanju disciplinske mjere u prvom stepenu u skladu sa pravilnikom koji donosi Senat Univerziteta,
  - k) predlaže dnevni red Stručnog vijeća,

- l) odlučuje o pravima i obavezama iz radnog odnosa u skladu sa zakonom, općim aktima Univerziteta i aktima članice u prvom stepenu,
- m) donosi pojedinačne akte u skladu sa zakonom, ovim Statutom i općim aktima Univerziteta,
- n) obavlja poslove koje je iz svoje nadležnosti na njega prenio rektor i obavlja i druge poslove utvrđene zakonom, ovim Statutom i drugim općim aktima Univerziteta i članice.

#### Član 116b.

(Odgovornost direktora Stomatološkog kliničkog centra)

- (1) Direktor za svoj rad odgovara Stručnom vijeću, rektoru i Upravnom odboru.
- (2) Direktor je odgovoran za zakonitost rada članice i izvršavanje odluka Upravnog odbora, Senata, Stručnog vijeća, rektora, te ostalih tijela Univerziteta u skladu sa zakonom i ovim Statutom.
- (3) Direktor je odgovoran za zakonitost rada članice i efikasno obavljanje djelatnosti, naročito u: dijelu finansijskog poslovanja, postupcima javnih nabavki, korištenju i upravljanju imovinom članice, upravljanju projektima i drugim oblastima u skladu sa zaključenim ugovorom o međusobnim pravima i obavezama između rektora i direktora, registriranom djelatnošću, ovim Statutom i drugim relevantnim propisima koji uređuju ovu oblast.
- (4) Direktor ima svojstvo subjekta nadzora i odgovoran je za nadzor koji se provodi i/ili odnosi na članicu, izvršenje i postupanje po naloženim upravnim i drugim mjerama u postupcima otklanjanja uočenih nepravilnosti.
- (5) Direktor je obavezan poništiti, staviti van snage, odnosno obustaviti od izvršenja odluku tijela članice ako je protivna zakonu, podzakonskim i provedbenim aktima i ovom Statutu.
- (6) Direktor je ovlašten suspendirati šefa klinike ili službe ili nekog drugog tijela ukoliko isti ne izvršava zakonito i savjesno svoje obaveze definirane zakonom, ovim Statutom ili drugim općim aktom Univerziteta i članice, te o tome u roku od sedam dana od donošenja odluke obavijestiti:
  - a) Stručno vijeće,
  - b) rektora.
- (7) Direktor je obavezan da podnese izvještaj Stručnom vijeću i rektoru o poslovanju članice za prethodnu godinu najkasnije do 15. marta tekuće godine.
- (8) Direktor može ovlastiti člana Stručnog vijeća da ga zamjenjuje u obavljanju određenih poslova iz nadležnosti direktora.“

#### Član 7.

*(Novi članovi 124a., 124b., 124c., 124d. i 124e.)*

Iza člana 124. Statuta dodaju se novi članovi 124a., 124b., 124c., 124d. i 124e. koji glase:

#### „Član 124a.

(Uvjeti za izbor direktora Stomatološkog kliničkog centra)

- (1) Za direktora može biti izabrano lice u radnom odnosu na Univerzitetu u Sarajevu - Stomatološkom kliničkom centru, koje posjeduje izbor u zvanje vanrednog ili redovnog profesora na Univerzitetu u Sarajevu-Stomatološkom fakultetu.
- (2) Direktor u toku mandata ne može vršiti funkciju člana Upravnog odbora, obavljati funkcije u organima izvršne i zakonodavne vlasti, političkim strankama, te udruženjima/organizacijama iz oblasti sindikalnog organiziranja, kao i ostale funkcije čije je obnašanje ograničeno posebnim propisima.
- (3) Za direktora ne može biti izabrano lice koje je prijevremeno razriješeno sa funkcije direktora na način i u postupku utvrđenom zakonom i ovim Statutom.
- (4) Lice iz stava (3) ovog člana ne može biti birano za direktora u periodu od četiri godine od datuma donošenja odluke o prijevremenom razrješenju.
- (5) Za vrijeme trajanja mandata direktor ne može istovremeno vršiti funkciju šefa klinike ili rukovodioca podorganizacione jedinice.
- (6) Mandat direktora traje četiri godine sa mogućnošću jednog ponovnog izbora na funkciju direktora.

#### Član 124b.

(Postupak izbora direktora Stomatološkog kliničkog centra)

- (1) Postupak izbora direktora pokreće Stručno vijeće svojom odlukom najranije četiri, a najkasnije tri mjeseca prije isteka mandata direktora na dužnosti. Na istoj sjednici imenuje se komisija za provođenje postupka izbora direktora koja broji pet članova u nastavnom zvanju. Prijavljeni kandidat za direktora ne može biti član komisije.
- (2) Konkurs za izbor direktora objavljuje se u najmanje jednom dnevnom listu i na internet stranici Univerziteta i Stomatološkog kliničkog centra. Rok za prijavljivanje kandidata je 15 dana od dana objavljivanja konkursa.
- (3) U prijavi za izbor direktora kandidati, pored dokumenata kojima dokazuju da ispunjavaju uvjete predviđene zakonom, prilažu: biografiju, program rada i razvoja Stomatološkog kliničkog centra za naredni mandatni period.
- (4) Nakon isteka roka za prijavljivanje kandidata, komisija u roku od sedam dana podnosi izvještaj Stručnom vijeću o prijavljenim kandidatima odnosno o kandidatima koji ispunjavaju utvrđene uvjete.
- (5) Direktor u roku od sedam dana od dana podnošenja izvještaja komisije saziva sjednicu Stručnog vijeća na koju se pozivaju kandidati koji ispunjavaju uvjete za izbor direktora koji na istoj sjednici javno prezentiraju svoj program rada i razvoja.
- (6) Nakon javne prezentacije programa rada kandidata za izbor direktora, Stručno vijeće na istoj sjednici bira direktora.
- (7) Stručno vijeće bira direktora tajnim glasanjem. Za direktora je izabran kandidat koji je dobio natpolovičnu većinu glasova od ukupnog broja članova Stručnog vijeća.
- (8) Ukoliko se u postupku za izbor direktora prijavi jedan kandidat, a nakon obavljenog glasanja ne dobije potrebnu većinu glasova, glasanje se ponavlja još jednom. U slučaju da u ponovljenom glasanju kandidat ne dobije potrebnu većinu glasova, cjelokupni izborni postupak se ponavlja.

- (9) Ukoliko se u postupku za izbor direktora prijavi više kandidata, izabran je onaj kandidat koji dobije potrebnu većinu glasova. Ako niti jedan kandidat ne dobije potrebnu većinu glasova, glasanje se ponavlja. U ponovljenom glasanju izbor se vrši između dva kandidata koji su dobili najveći broj glasova, odnosno između više njih ako su dobili jednak broj glasova. U ponovljenom glasanju izabran je onaj kandidat koji dobije potrebnu većinu. Ukoliko u ponovljenom glasanju dva ili više kandidata dobiju podjednak broj glasova, glasanje se ponavlja još jednom. U slučaju da ni tada nijedan kandidat ne dobije potrebnu većinu glasova, cjelokupni izborni postupak se ponavlja.
- (10) Nakon donesene odluke o izboru, Stručno vijeće dostavlja rektoru na potpis odluku o imenovanju direktora.
- (11) Nakon donesene odluke o izboru direktora, rektor donosi rješenje o imenovanju direktora i isto upućuje Stomatološkom kliničkom centru radi dostavljanja obavještenja o tome.
- (12) Protiv rješenja iz stava (11) ovog člana kandidati koji učestvuju u proceduri izbora mogu izjaviti žalbu Senatu Univerziteta u roku od 15 dana od datuma prijema obavještenja.
- (13) Odluka Senata iz stava (12) ovog člana je konačna, a protiv iste se može pokrenuti postupak pred nadležnim sudom.
- (14) Izuzetno od stava (11) ovog člana, rektor može odbiti da potpiše rješenje o imenovanju direktora uz obrazloženje koje se dostavlja Stručnom vijeću na očitovanje. Ukoliko Stručno vijeće prihvati obrazloženje rektora, postupak izbora direktora se ponavlja.
- (15) Ukoliko Stručno vijeće odbije obrazloženje iz stava (14) ovog člana, obrazloženje rektora i očitovanje Stručnog vijeća u roku od 8 dana dostavljaju se Senatu na razmatranje i odlučivanje.
- (16) Odluka Senata iz stava (15) ovog člana je konačna, a protiv iste se može pokrenuti postupak pred nadležnim sudom.

#### Član 124c.

(Početak i prestanak mandata direktora Stomatološkog kliničkog centra)

- (1) Mandat direktora, u pravilu, započinje 1. oktobra u godini u kojoj je izabran, a prestaje 30. septembra u godini u kojoj mu ističe mandat.
- (2) Odluka o imenovanju direktora sadrži:
  - a) ime i prezime izabranog direktora,
  - b) datum kada izabrani direktor stupa na dužnost i
  - c) trajanje mandata.
- (3) Prije preuzimanja dužnosti direktora izabrani direktor je obavezan potpisati izjavu o prihvatanju dužnosti.
- (4) Direktor prestaje mandat u sljedećim slučajevima:
  - a) istekom perioda na koji je biran,
  - b) ostavkom/na lični zahtjev,
  - c) trajnim gubitkom sposobnosti za obavljanje dužnosti,
  - d) prijevremenim razrješenjem,
  - e) izborom na neku drugu funkciju nespojivu sa funkcijom direktora.

#### Član 124d.

(Prijevremeno razrješenje direktora Stomatološkog kliničkog centra)

- (1) Postupak prijevremenog razrješenja direktora provodi se u skladu sa zakonom i ovim Statutom.
- (2) Obrazložen prijedlog za pokretanje procedure prijevremenog razrješenja direktora može se podnijeti u sljedećim slučajevima:
  - a) ako bude pravosnažno osuđen za krivično djelo,
  - b) ako ne izvršava zadatke predviđene zakonom i ovim statutom,
  - c) ako prekorači ovlaštenje,
  - d) ako prouzrokuje štetu Univerzitetu/članici,
  - e) zbog odsutnosti ili sprječivosti da u neprekidnom periodu dužem od tri mjeseca obavlja dužnost,
  - f) ako svojim ponašanjem i djelovanjem povrijedi ugled Univerziteta/članice i funkcije direktora.
- (3) Obrazloženi prijedlog za prijevremeno razrješenje direktora iz jednog ili više razloga navedenih u stavu (2) ovog člana Stručnom vijeću može podnijeti:
  - a) osnivač Univerziteta,
  - b) Upravni odbor,
  - c) najmanje jedna trećina članova Senata,
  - d) rektor,
  - e) najmanje jedna trećina članova Stručnog vijeća.
- (4) Direktor je dužan sazvati sjednicu vijeća najkasnije 15 dana od datuma prijema prijedloga iz stava (3) ovog člana i o tome obavijestiti rektora i osnivača.
- (5) Ukoliko direktor u roku preciziranom u stavu (4) ovog člana ne sazovu sjednicu Stručnog vijeća, Senat je dužan imenovati vršioca dužnosti predsjedavajućeg Stručnog vijeća koji je dužan u roku od sedam dana od dana imenovanja sazvati sjednicu Stručnog vijeća.
- (6) O prijevremenom razrješenju direktora Stručno vijeće odlučuje tajnim glasanjem, pri čemu je za donošenje odluke o razrješenju potrebna natpolovična većina od ukupnog broja članova Stručnog vijeća.
- (7) Odluka Stručnog vijeća je konačna, a protiv iste se može pokrenuti postupak pred nadležnim sudom u Sarajevu u roku od 30 dana od dana prijema odluke.
- (8) Na istoj sjednici Stručnog vijeća, nakon donošenja odluke o razrješenju, donosi se odluka o imenovanju vršioca dužnosti direktora. Ovom sjednicom predsjedava dobno najstariji član Stručnog vijeća. U slučaju da Stručno vijeće odbije inicijativu za razrješenje direktora, nova inicijativa od istog predlagача ne može se podnijeti prije isteka roka od šest mjeseci od podnošenja prethodne inicijative.

#### Član 124e.

(Imenovanje vršioca dužnosti direktora Stomatološkog kliničkog centra)

- (1) U slučaju prijevremenog razrješenja direktora, na istoj sjednici Stručno vijeće iz reda članova u nastavnom zvanju na prijedlog članova Stručnog vijeća bira vršioca dužnosti



direktora koji obavlja dužnost do izbora novog direktora, a najduže šest mjeseci, te na istoj sjednici donosi odluku o raspisivanju konkursa za izbor direktora.

- (2) U slučaju da direktoru prestane mandat i/ili procedura za izbor novog direktora ne bude okončana u utvrđenom roku, Stručno vijeće iz svojih redova imenuje vršioca dužnosti direktora koji obavlja dužnost direktora do izbora novog direktora, a najduže šest mjeseci, te na istoj sjednici obavezno donosi odluku o raspisivanju konkursa za izbor direktora.
- (3) Sjednicom Stručnog vijeća u slučajevima iz st. (1) i (2) ovog člana predsjedava, te po potrebi i saziva, dobno najstariji član Stručnog vijeća.
- (4) Vršioca dužnosti direktora bira Stručno vijeće tajnim glasanjem, natpolovičnom većinom ukupnog broja članova Stručnog vijeća.
- (5) Direktor kojem je istekao drugi mandat ili koji je prijevremeno razriješen ne može biti imenovan za vršioca dužnosti.“

### **Član 8.**

#### ***(Izmjena člana 132.)***

U članu 132. Statuta u stavu (5) na početku, ispred riječi „Fakulteti“ dodaju se riječi „Stomatološki klinički centar i“.

### **Član 9.**

#### ***(Novi član 295a.)***

Iza člana 295. Statuta dodaje se novi član 295a. koji glasi:

#### **„Član 295a.**

(Provedba statusne promjene Univerziteta u Sarajevu – Stomatološkog fakulteta sa stomatološkim kliničkim centrom)

- (1) Vijeće Univerziteta u Sarajevu – Stomatološkog fakulteta na konstituirajućoj sjednici donosi odluku o raspisivanju konkursa za izbor dekana.
- (2) Stručno vijeće Univerziteta u Sarajevu – Stomatološkog kliničkog centra na konstituirajućoj sjednici donosi odluku o raspisivanju konkursa za izbor direktora.
- (3) Do upisa statusne promjene podjele dosadašnje članice Univerziteta u Sarajevu - Stomatološkog fakulteta sa stomatološkim kliničkim centrom na dvije punopravne članice: Univerzitet u Sarajevu - Stomatološki fakultet i Univerzitet u Sarajevu - Stomatološki klinički centar u registru kod nadležnog Suda dosadašnju članicu koja prestaje djelovati, Univerzitet u Sarajevu – Stomatološki fakultet sa stomatološkim kliničkim centrom, predstavlja i zastupa dekan u zatečenom mandatu.
- (4) Pravni sljednik klinika stomatološkog fakulteta je Univerzitet u Sarajevu - Stomatološki klinički centar. Univerzitet u Sarajevu - Stomatološki klinički centar će se registrovati u skladu sa odredbama Zakona o stomatološkoj djelatnosti („Službene novine FBiH“, broj 37/12) kao klinike stomatološkog fakulteta (nastavna baza fakulteta pod nazivom Univerzitet u Sarajevu - Stomatološki klinički centar).

(5) Ostale odredbe Statuta primjenjuju se na punopravnu članicu Univerziteta u Sarajevu – Stomatološki klinički centar u dijelu u kojem nisu u suprotnosti sa obavljanjem djelatnosti ove članice.“

**Član 10.**  
**(Primjena)**

U ostalom dijelu Statut ostaje nepromijenjen i u svemu se odgovarajuće primjenjuje.

**Član 11.**  
**(Stupanje na snagu)**

Ove izmjene i dopune Statuta Univerziteta u Sarajevu stupaju na snagu u roku od 8 (osam) dana od dana objavljivanja na internet stranici Univerziteta u Sarajevu.

**REKTOR**

*Prof. dr. Rifat Škrijelj*



Broj: 01-13-121-1/24

Sarajevo, 17. 07. 2024. godine